



## Сақтар туралы

Қазақ жерін мекен еткен көне тайпалар арийлер мен турлар туралы «тарихтың атасы» атанған ежелгі грек тарихшысы Геродоттың жазған еңбектерінде құнды мәліметтер кездеседі. Геродоттың жазған еңбектері қазақ тарихына өзіндік үлес қосатын деректер екені белгілі. Археологиялық мәліметтер бойынша сақ тайпалары Қазақстан аумағын біздің заманымыздан бұрынғы VII-IV ғасырларда мекендеген. Олар әртүрлі аталған. Сақтарды ежелгі грек авторлары «азиялық скифтер», парсы авторлары «құдіретті еркектер», иран жазбаларында «жүйрік атты турлар» деп атаған. Сақтарда негізінен әскери қоғам болды. Сақ тайпалары үш топқа бөлінген:

1. Шошақ бөрікті сақтар (тиграхауда) Тянь-Шань тауын, Жетісу жерін, Сыр-

дарияның орта ағысын мекендеген.

2. Теңіздің арғы жағындағы сақтар (парадарайа) Қаратеңіздің солтүстігін, Арал маңын, яғни Сырдария мен Өмударияның төменгі ағысын мекендеген.

3. Хаума сусынын дайындайтын сақтар (хаумаварга) қазіргі Өзбекстан мен Қырғызстан жерін мекендеген.

Сақ қоғамында әскери демократия құрылысы болған. Тайпа көсемі бас қолбасшы болды. Сақ қоғамы мүшелері үш әлеуметтік топқа бөлінді. Олардың әрқайсысына бір түс тән болды.

1. Жауынгерлер (қызыл киім киіп жүрген)

2. Абыздар (ақ киім киіп жүрген)

3. Шаруалар (сары немесе көк киім киіп жүрген)

Патшалар жауынгерлер тобынан шықты. Сақ жауынгерлерінің ерлігі туралы көптеген дерек-әңгімелер бар. Олар біздің заманымыздан бұрынғы 519-518-жылдар аралығында парсы басқыншыларына, яғни I Дарийдің әскеріне қарсы ерлікпен шайқасты. Ал сақтың әйел патшасы Томирис парсы патшасы Кирдің әскерін жеңген. Біздің заманымыздан бұрынғы IV ғасырда Александр Македонскийдің Орта Азия жеріне жорығы басталды. Ол біздің заманымыздан бұрынғы 330-327-жылдары Сырдарияның сол жағалауындағы өңірлерді түгелге жуық басып алып

шеткі Александрия қаласын салады. Бірақ, Сырдарияның оң жағалауындағы сақтардан жеңіледі.

Сақтар негізінен мал шаруашылығымен айналысты. Мал шаруашылығының үш түрі болды:

1. Көшпелі мал шаруашылығы Батыс және Орталық Қазақстанда өріс алды.

2. Жартылай көшпелі мал шаруашылығы Алтай, Тянь-Шань тауларының маңында, Жетісу мен Шығыс Қазақстанда көп тарады.

3. Отырықшы шаруашылық (егіншілік) Оңтүстік Қазақстандағы Сырдария, Келес, Шу өзендерінің бойында тараған.

Сақтар жылқы, қой, түйені көп өсірген, ірі қара аз болды. Бидай, тары, қара бидай өсірді.

Жалпы ерте кезде өмір сүрген ғалымдар мен саяхатшылардың қазақ елі жайында жазып қалдырған деректері бүгінгі күні Отанымыздың тарихын қайта қарап, ақиқат тұрғысында жазуға көп көмегін тигізіп отыр. Осынау құнды деректердің біздің тарихымыз үшін баға жетпес қазына екенін мойындауымыз қажет.

**Гүлім ДОСБАЕВА,**  
**№4 орта мектептің**  
**тарих пәні мұғалімі.**

**Жәпек батыр ауылы Іле ауданы.**